

Plenchi

Bèl a bati

Tring tring bèlèm bèlèm. Yega yega pa nos por papia riba plenchi. Nos ta aserkando dia di dosente. Un dia pa reflekshoná riba e dosentenan ku a hasi impakto den boso bida.

Siman ku a pasa tabata tenso a bin algun nubia ku a plama awaseru tambe pa nos naturalesa, pero tambe pa fria e tenshon un poko. Ban spera ku siman ta habri sin mas tenshon i ku pronto nos tur por sigui traha ku otro den pas i trankilidat.

Pasa un wikent yen di pas i trankilidat, kontando bo bendishonnan.

Orashon

Señor yená nos kurason ku amor

Siña nos pa nos apresiá nos diferenshanan

Pa nos respetá otro su punto di bista

Pa nos por skucha bon, no pa nos kontestá

Pero pa nos purba komprondé e otro su punto di bista

Danki pa bo sabiduria Señor i bo pordon si akaso tog nos faya.

Den agènda

5 oktober dia di dosente

Fakansi di skol

- **10 oktober pa 14 oktober**
- **19 desember pa 4 yanuari**

Riba roster

Frater Aurelio SBO....awor ku su propio gymzaal. E rekonosementu ta bai na Meneer Barriento ku a haña e honor awe....pa e sala karga su nòmber...pa tantu trabou ku el a hasi pa RK-scholen i pa ta fasina ku deporte i musika. Jean Julien Rojer huntu ku Eke Barriento a habri e sala aki i Pastor Mark a bin bendishoné i trese un bunita mensahe pa studiantenan, dosentenan, personal di Frater Aurelio SBO ku tur invitado presente i direktiva di skolnan Katólíko.





Riba rapòrt

Bou di guia di mener Saeed Lourens, alumnonan di Br. Rigobertus a traha na e proyekto “Koken en Serveren”. E proyekto aki a duna un aporte grandi na e hobennan su formashon. Nan a traha segun e konsepto di edutainment. E konsepto aki enserá ku paso pa paso ta traha pa logra un resultado final. Den e konsepto aki plaser i edukashon ta kana man ta man. Asina hobennan ta logra nan ambishonnan i metanan den bida. Mener Saed a laga e hobennan deskubrí nan talento durante e lèsnan di kushiná i sirbi.

Faktornan manera konfiansa propio i prestashon optimal ta importante. E proyekto aki ta desaroya e materianan lesa, skibi, aritmetika, usa sèn, plania efisiente. Ku tur loke nan ta desaroyá den e proyekto al fin nan mester logra e meta mas haltu, konfiansa propio, kontrol riba situashon I konfia riba nan kapasidatnan. Pabien na e hobennan pa nan dedikashon I na mener Saed pa su formashon. Na henter e tim de Br. Rigobertus, pabien ku boso esfuerso a

duna resultado pa nos hobennan. Un pabien speshal ta bai na e hóbennan Jouwendrick Mingeli, Djeffete Jolcin, Danrickson Russel ku a traha den e proyekto.





Mi ta konta

Mi promesa

Demasiado biaha adultonan ta bagatalisá preokupashonnan di muchanan. Nan ta lubidá kon un mucha ta reakshoná den sierto situashon. Komo si fuera nan mes nunca tabata mucha, òf ku nan tambe tabatin yu chikí. Kon por ta ku un persona por tin pasenshi de sobra pa su mes yu, pero tur loke yu di otro hende hasi ta kansa su chip? Bai misa òf un restorant. Si un mucha chikí kuminsá yora tin adulto ku ta traha un kara asina rabia, ku bo ta kere ta guera mundial. Niun tiki pasenshi i empatia. Di otro banda tin mayor ku por laga nan yu yora mas ku 20 minut den grupo sin tene kuenta ku nan yu ta stroba otronan di pone atenshon.

Anochi hopi biaha mucha ta sinti miedu i ta pensa yen di kos. Diferente kos ta pasa den nan kabes. Nan ta bira nervioso paso nan no ke muri. Nan no ke pa nan mama muri etc etc. Tur esaki ta hansha nan. Un hansha pa e loke bo no por komprondé i ku bo sa ku lo bin un dia. Ma priminti mi mes ku ora mi bira adulto mi no ta lubidá ku mi tabata chiki un tempu. Ni maske e preokupashonnan di e muchanan por ta parse chiki pa mi komo adulto, pa nan e ta grandi. Nos mester hinka nos mes den nan mundu pa por guianan. Si nos ke siña nos muchanan komprondé i respetá otro su sentimentu, nos mes mester hasi esei ku nan promé. Mi promesa tabata na mi mes, durante un di e anochinan

yen di preokupashon i hansha, ku mi lo no lubida ora mi ta grandi kon mucha ta sinti i pensa.

Mucha djispou

Patricia a spanta ora el a tende yufrou grita su nòmber

“Patricia, ta basta. Ta di 3 biaha ku bo ta wak riba Janice su blachi, bo sa si ku ta proefwerk nos tin tòg?”

Patricia: “yufrou mi no por yuda.”

Yufrou: “yuda ku kiko, ku bo ta kijk af?”

Patricia: “no yufrou, ku Janice ta skibi asina mahos ku mi no por lesa kiko e ta skibi.”